

**KOMISI O LE TOEFUATAIGA O TULAFONO
A SAMOA**

SAMOA

Faatulagaina o Aiaiga

- | | |
|--|--|
| 1. Igoa puupuu ma le amataga | 16. Tofiga o Faamasino e avea ma Komesina |
| 2. Faamatalaina o uiga o upu | 17. Totogi o Sui auai o le Komiti Faufautua |
| 3. Tulafono e noatia ai le Malo | 18. Aufaigaluega a le Komisi o le Toefuataiga o Tulafono |
| 4. Faamoemoega | 19. Tofiga o Tagata faigaluega a le Malo |
| 5. Faavaeina | 20. Supaaneueta po o alauni litaea |
| 6. Matafaioi | 21. Puiipua mai moliaga tau i le va o tagata |
| 7. Pule | 22. Tupe e ao ona faatatauina e le Fono Aoao Faitulafono mo faamoemoega o lenei Tulafono |
| 8. Taualumaga | 23. Vaegatupe a le Komisi |
| 9. Tiute tauave a le Komisi ma le Minisita | 24. Pule faaletulafono a le Komesina o Sulufaiga (Ombudsman) i luga o le Komisi |
| 10. Sui auai | 25. Pule e faia ai tulafono faatonutonu |
| 11. Komesina o le Toefuataiga o Tulafono | |
| 12. Fono o Tofiga o le Toefuataiga o Tulafono | |
| 13. Komiti Faufautua a le Komisi o le Toefuataiga o Tulafono | |
| 14. Avanoa o le Tofi o le Komesina o le Toefuataiga o Tulafono | |
| 15. Totogi ma alauni o le Komesina o le Toefuataiga o Tulafono | |

O SE TULAFONO e faavae ai le Komisi o le Toefuataiga o Tulafono a Samoa mo le toe tagai totoa ma le atinae o Tulafono a Samoa. *[28 Mati 2002]*

UA FAIA e le Fono Aoao Faitulafono a Samoa i totonu o le Palemene ua potopoto e faapea:-

1. Igoa puupuu ma le amataga-(1) E mafai ona taua leni Tulafono o le Tulafono o le Komisi o le Toefuataiga o Tulafono a Samoa 2002.

(2) O leni Tulafono o le a amata faamamaluina i le aso o le a fuafuaina e le Minisita ma faasalalauina i totonu o le Savali.

2. Faamatalaina o uiga o upu – I totonu o leni Tulafono:

“Tulafono” o lona uiga o le Tulafono a le Komisi o le Toefuataiga o Tulafono a Samoa 2002:

“Komiti Faufautua” o lona uiga o le Komiti Faufautua a le Komisi o le Toefuataiga o Tulafono ua faavaeina i lalo o le fuaiupu 13:

“Komisi” o lona uiga o le Komisi o le Toefuataiga o Tulafono ua faavaeina i lalo o le fuaiupu 5:

“Komesina” o lona uiga o le Komesina o le Toefuataiga o Tulafono ua tofia e tusa ai ma le fuaiupu 11:

“Fono Faatonu” o lona uiga o le Fono Faatonu ua faavaeina i lalo o le Mataupu 39 o le Faavae:

“Matagaluega a le Malo” o lona uiga o se matagaluega ua taua i le Vaega I o le Faamatalaga i le Tulafono o le Komesina o Sulufaiga (Ombudsman) 1988:

“Faalapotopotoga a le Malo” o lona uiga o se faalapotopotoga ua taua i le Vaega II o le Faamatalaga i le Tulafono o le Komesina o Sulufaiga (Ombudsman) 1988:

“Fono o Tofiga o le Toefuataiga o Tulafono” o lona uiga o le Fono o Tofiga o le Toefuataiga o Tulafono ua faavaeina i lalo o le fuaiupu 12:

“Minisita” o lona uiga o le Minisita o Faamasinoga:

“Tagata faigaluega a le Malo” o lona uiga o so o se tagata ua faafaigaluegaina i lalo o le Tulafono o Galuega a le Malo 1977:

“Galuega a le Malo” o lona uiga o Galuega a le Malo e pei ona faamatalaina i le Mataupu 83 o le Faavae:

3. Tulafono e noatia ai le Malo – O lenei Tulafono o le a noatia ai le Malo.

4. Faamoemoega – O le faamoemoega o lenei Tulafono ina ia faataga ai le toe tagai totoa, toefuataiga ma le atinae o Tulafono a Samoa ina ia mafai ai ona uunaia tu ma aganuu a Samoa ma faamalositia ai tulaga i le vafealoaloai, aganuu, tamaoaiga ma le atinae o pisinisi a Samoa.

5. Faavaeina-(1) Ua faavaeina nei le Komisi o le Toefuataiga o Tulafono.

(2) O le Komisi o le a avea o se faalapotopotoga tuufaatasia faaletulafono e faatumauina lona tulaga alualu i luma faatasi ai ma se faamaufaaailoga, ma e tatau ona mafai e ia ona mauaina mai, umia, ma faamatuu atu ni meatotino moni ma tau i le tagata lava ia, i le ulufale atu i totonu o ni konekarate, le molia ma le moliaina, ma i le faia ma le tauaveina ai o ia gaoioiga uma ma isi gaoioiga e pei ona faia ma tauaveina e isi faalapotopotoga tuufaatasia faaletulafono.

6. Matafaioi – O matafaioi a le Komisi e faapea:

- (a) Ina ia tuuina atu ni fautuaga i le Minisita e fautuaina ai ni polokalame mo le toefuataiga o tulafono a Samoa;
- (b) E tusa ai ma faasinomaga ua faia i ai e le Minisita (pe i luga o se fautuaga a le Komisi po o se isi tulaga e ese mai ai) ina ia suesue ma sailiili auiliili i vaega o tulafono ua ia manatu ua manaomia ona toefuatai ma lipoti atu ana fautuaga mo le toefuataiga i le Minisita;

- (c) E pei ona ua manatu le Komisi ua talafeagai ai, e fautuaina Matagaluega a le Malo po o isi Faalapotopotoga a le Malo i le faiga po o mataupu o le toe tagai totoa i tulafono o lo o tauaveina e ia Matagaluega po o Faalapotopotoga; ma
- (d) E pei ona ua manatu le Komisi ua talafeagai ai, ia feutagai ma fautuaina le atunuu lautele e tusa ai ma ana galuega.

7. Pule-(1) O le a i le Komisi pule uma e pei ona o le a talafeagai po o le mafai ona faatelevave ai le tauaveina o ana matafaioi.

(2) E aunoa ma le faatapulaaina ai o tulaga aoao o le faafuaiupu (1), o le a i le Komisi le pule:

- (a) E faafaigaluegaina ai ni tagata faigaluega;
- (b) E faia ai po o le lagolagoina ai o ni suesuega ma ni sailiiliga e pei ona ua manatu o ia ua talafeagai ai mo le faatinoina ma le tauaveina lelei o ana matafaioi;
- (c) Ia feutagai ma so o se Matagaluega a le Malo po o Faalapotopotoga a le Malo e tusa ai ma le toe tagai totoa i so o se tulaga o le tulafono ma ia talosaga ma mauaina mai i so o se Matagaluega a le Malo po o Faalapotopotoga a le Malo ia faamatalaga e faasino i le toe tagai totoa i tulafono e pei ona talafeagai ai;
- (d) Faasalalauina faalauaitetele o ana galuega, le faia o ni fonotaga e fofogaina ai ana galuega i se tulaga lautele, sailia ni manatu mai tagata lautele e tusa ai ma ana fuafuaga, ma feutagai ma so o se tagata po o ni vaega o ni tagata;
- (e) Le faafaigaluegaina po o le mauaina mai i so o se isi faiga e ese mai ai ni auaunaga mai tagata agavaa ma talafeagai e fesoasoani ai i ana galuega; ma
- (f) Le faasoaina atu i se faiga tusitusia, i se sui auai po o ni sui auai o le afaigaluega le pulea ma le faafoeina o galuega a le Komisi mai lea aso ma lea aso.

8. Taulumaga – I le noatia ma le fai fuafua i aiaiga o lenei Tulafono e mafai e le Komisi ona faatonutonu ana taulumaga i se faiga e pei ona ua manatu o ia ua talafeagai ai.

9. Tiute tauave a le Komisi ma le Minisita-(1) O le a tataui i le Komisi ona:

- (a) Saunia ma tuuina atu i le Minisita, ia le itiiti ifo i le faa-tasi i se tausaga, se fuafuaga auiluma ua maea ona saunia mo galuega a le Komisi;
 - (b) Tuuina atu i le Minisita, ma faasalalau, lipoti ua saunia e ia e tali atu ai i tuutuuga o le faasologa o galuega ua faamaonia e le Minisita; ma
 - (c) Tuuina atu se lipoti faaletausaga i le Minisita e tusa ai ma gaioioiga ma tupe faaalu a le Komisi.
- (2) A fai ua tuuina atu e le Komisi i le Minisita se lipoti, e tataui i le Minisita ona faataatia se ata o le lipoti i luma o le Fono Aoaofaitulafono i se taimi vave lava e mafai ai ina ua maea ona mauaina e ia lea lipoti.
- (3) E mafai e le Minisita i so o se taimi:
- (a) Ona manaomia le Komisi e sutesueina so o se vaega o tulafono a Samoa ma e tataui i le Komisi ona toe tagai totoa i le tulafono e tusa ai ma lea manaoga ma lipoti atu i le Minisita faatasi ai ma ana fautuaga;
 - (b) Tuuina atu i le Komisi ni faatonuga e tusa ai ma le faasologa e tagofia ai ana faamatalaga ma mataupu.

10. Sui auai-(1) O le Komisi o le a aofia ai le Komesina o le Toefuataiga o Tulafono.

(2) O le Komesina o le a avea o le pule sili ma o le a ia vaavaaia ma faatonutonu galuega a le Komisi.

11. Komesina o le Toefuataiga o Tulafono-(1) O le Komesina o le Toefuataiga o Tulafono o le a tofia e le Fono Faatonu i luga o le fautuaga a le Fono o Tofiga o le Toefuataiga o Tulafono.

(2) O le Komesina o le a avea o se tagata o ia lea:

- (a) O lo o umia se faailoga faa-loia aloaia i mataupu tau tulafono;
 - (b) O lo o i ai se poto masani ia le itiiti ifo i le valu tausaga i galuega faa-loia i totonu o faamasinoga ma / po o loia mo tagata lautele po o isi galuega faaletulafono; ma
 - (c) O lo o i ai ni agavaa tau poto faapitoa mo le tofia i tofiga faa-faamasinoga; ma
 - (d) Faamalieina so o se isi agavaa ma amioga manaomia e pei ona faatonuina e le Fono Faatonu i luga o le fautuaga a le Fono o Tofiga o le Toefuataiga o Tulafono.
- (3) O le tofi o le Komesina e tataua ona faasalalauina a o le i faia se tofiga po o le toe tofia foi o le sa umia le tofi.
- (4) O le tofiga o le Komesina o le a mo se vaitaimi e oo atu i le lima tausaga, o tuutuuga ma aiaiga o le tofiga o le faatulagaina e le Fono Faatonu i luga o le fautuaga a le Fono o Tofiga o le Toefuataiga o Tulafono.
- (5) O le Komesina o le a agavaa mo se isi vaitaimi se tasi o le tofiga e oo atu i le lima tausaga, o tuutuuga ma aiaiga o le faatulagaina e tusa ai ma le faafuaiupu (4).

12. Fono o Tofiga o le Toefuataiga o Tulafono-(1) Ua faavaeina nei le Fono o Tofiga o le Toefuataiga o Tulafono.

(2) O le Fono o Tofiga o le Toefuataiga o Tulafono o le a i ai ni sui auai tutusa faapea foi ma ana taualumaga e pei ona faasinomia i le Komisi o Galuega faa-Faamasinoga e tusa ai ma le Mataupu 72(1) ma le (2) o le Faavae.

(3) O le Fono Faatonu ma le Fono o Tofiga o le Toefuataiga o Tulafono o le a i ai le pule e faia ai mea uma talafeagai pe mafai ona faia mo, po o i sootaga ma, le faatinoina o a latou matafaioi taitasi e tusa ai ma lenei Tulafono.

13. Komiti Faufautua a le Komisi o le Toefuataiga o Tulafono-(1) O le Komisi o le a fesoasoani i ai se Komiti Faufautua.

(2) O le Komesina o le a valaauina le usuia o ni fonotaga a le Komiti Faufautua ia le itiiti ifo i le fa (4) i tausaga taitasi.

(3) O le Komiti Faufautua o le a aofia ai i latou ua taua:

- (a) Toaiva sui auai, e tofia e tusa ai ma o latou tofi ua taua i lalo -
- (i) o le Loia Sili;
 - (ii) Failautusi o Mataupu Tau le Lotoifale;
 - (iii) Failautusi o Faamasinoga;
 - (iv) Failautusi o Mataupu Tau Tina ma Tamaitai;
 - (v) o le Komesina o Leoleo, Falepuipui ma Tinei Mu;
 - (vi) Peresetene o le Sosaiete a Loia a Samoa, po o sona sui mai lea taimi i lea taimi;
 - (vii) le Peresetene o le Aufaipisinisi ma Fale Gaosi Oloa Tuufaatasia, po o sona sui mai lea taimi i lea taimi;
 - (viii) o le Peresetene o Ekalesia Soofaatasi, po o sona sui mai lea taimi i lea taimi; ma
 - (ix) o le Peresetene o le Faalapotopotoga o Tagata Faigaluega a le Malo, po o sona sui mai lea taimi i lea taimi.
- (b) Toafa (4) ni sui auai e tofia e le Ao o le Malo, i luga o le fautuaga a le Minisita o Faamasinoga (ina ua maea ona feutagai ma le Minisita o Mataupu Tau Lotoifale ma Mataupu Tau Tina ma Tamaitai), o i latou ia e mafai ona avea ma Sui e fofogaina manaoga o le atunuu ona o lo latou -
- (i) auai malosi i faalapotopotoga tumaoti;
 - (ii) e malamalama lelei ma e fiafia i galuega a le Komisi; ma
 - (iii) e i ai le malosi e fisaofaga ai i le galuega a le Komisi.
- (4) O sui auai taitasi ua tofia i lalo o le fuaiupu 13(3)(b):
- (a) O le a tofia mo se vaitaimi e oo atu i le tolu tausaga ma e agavaa mo le toe tofia;
 - (b) E mafai i so o se taimi ona faamavae mai i lona tofiga i luga o se faasilasilaga tusitusia e faia i le Ao o le Malo; ma

- (c) E mafai i so o se taimi ona aveese mai lona tofiga e le Fono Faatonu e faia i luga o le fautuaga a le Fono o Tofiga o le Toefuataiga o Tulafono, ona o le le atoatoa lelei o le malosi o le tino, gaumativa, faatalale i le faatinoina o ona tiute po o amio le taupulea.

14. Avanoa i le Tofi o le Komesina o le Toefuataiga o Tulafono-(1) E mafai i so o se taimi ona aveesea le Komesina mai lona tofi e le Fono Faatonu, e faia i luga o le fautuaga a le Fono o Tofiga o le Toefuataiga o Tulafono, ona o le le atoatoa o le malosi, gaumativa, faatalale i le faatinoina o ona tiute, po o amio le taupulea.

(2) E mafai i so o se taimi ona faamavae le Komesina mai le tofi o le Komesina i le tuina atu lea o se faasilasilaga tusitusia i le Ao o le Malo.

15. Totogi ma alauni o le Komesina o le Toefuataiga o Tulafono-(1) I le noatia ma le fai fuafua i le fuaiupu 16 o le totogi ma alauni faapea foi ma faamanuiaga mo le tofi o le Komesina o le a faatulagaina i le 80% o le totogi, alauni ma faamanuiaga o lo o totogiina i le Faamasino Sili o le Faamasinoga Maua luga o Samoa.

(2) O le totogi, alauni ma faamanuiaga a le Komesina o le a le faaititia ao faagasolo le vaitaimi o lona tofi ae vagana ai o se vaega o se faaititiga aoao o totogi ua faaoga e faasafua tutusa i tagata uma e ana totogi ua fuafuaina e le Tulafono.

16. Tofiga o Faamasino e avea ma Komesina-(1) I le noatia ma le fai fuafua i le faafuuiupu (2) o lenei fuaiupu, i le tulaga e faapea o le a tofia ai se tagata ofisa o le faamasinoga e avea ma Komesina, o lona tofiga e le tataua ona aafia ai le tulaga faigaluega tumau a lona tagata ofisa po o le tulaga o lona Faamasino, igoa, tulaga iloga, totogi, alauni faaletausaga po o isi alauni po o aia tataua po o tulaga aloaia e avea ai o se Faamasino (e aafia ai faamanuiaga e pei o le supaaneueta) ma, mo faamoemoega uma, o le tautua e avea ai o se Komesina e tataua ona avea ma ana auunaga a o avea o ia ma se Faamasino.

(2) Afai i so o se taimi o le totogi ma alauni e pei ona faatulagaina mo le tofi o le Komesina e maualuga atu na i le totogi o so o se Faamasino o ia lea ua tofia e avea o se Komesina, o le totogi ma alauni e pei ona faatulagaina mo le tofi o le Komesina, e tatau ona maua e lena Faamasino i le faagasologa o lona taimi i le tofi o le Komesina.

17. Totogi o sui auai o le Komiti Faufautua – O sui o le Komiti Faufautua e mafai ona totogiina i ai ni totogifuapauina ma alauni e pei ona faatonuina e le Kapeneta.

18. Aufaigaluega a le Komisi o le Toefuataiga o Tulafono-(1) I le noatia ma le fai fuafua i aiaiga o lenei fuaiupu, e mafai e le Komesina mai lea taimi i lea taimi ona tofia ni tagata ofisa ma ni tagata faigaluega e aofia ai ni tagata ofisa faigaluega le tumau ma togiaso, e pei ona ua manatu le Komesina ua talafeagai ai mo le tauaveina lelei o matafaioi, pule ma tiute a le Komisi i lalo o lenei Tulafono ma isi tulafono e fesootai i ai.

(2) I le noatia ma le fai fuafua i tuutuuga ma aiaiga o galuega a le Komisi, e mafai e le Komesina i so o se taimi ona faamuta pe faamalolo mo se vaitaimi le tumau le faafaigaluegaina o ni tagata ofisa o le Komisi po o tagata faigaluega.

(3) O le aofai o tagata ofisa ma tagata faigaluega e mafai ona tofia i lalo o le faafuaiupu (1) o lenei fuaiupu, pe i se tulaga aoao po o e tusa ai ma so o se tiute ua faamaoti mai, e tatau ona fuafuaina e le Minisita mai lea taimi i lea taimi.

(4) O tagata ofisa ma tagata faigaluega ua tofia i lalo o le faafuaiupu (1) o lenei fuaiupu e tatau ona faafaigaluegaina i luga o ni tuutuuga ma aiaiga e pei ona fuafuaina e le Komesina mai lea taimi i lea taimi.

19. Tofia o Tagata Faigaluega a le Malo-(1) E ese mai ai i so o se aiaiga o le Tulafono o Galuega a le Malo 1977 po o so o se isi Tulafono e mafai ona tofia se tagata faigaluega a le Malo e avea ma se Komesina, tagata ofisa po o se tagata faigaluega a le Komisi ma i luga o le faamaeaina o lona tofiga i

le Komisi, o le a agavaa o ia e toe foi atu i Galuega a le Malo e aunoa ma le aveeseina o se totogi, alauni, tupe totogi, faamanuiaga (e aofia ai faamanuiaga faasino i se penisione po o se supaanueta); tulaga sinia / po o lona tulaga i totonu o Galuega a le Malo.

(2) I le noatia ma le fai fuafua i lenei Tulafono o se tagata faigaluega a le Malo ua tofia e avea ma se Komesina, tagata ofisa po o se tagata faigaluega o le Komisi e le tatau ona noatia i faatonuga po o le pule a le Minisita a so o se Matagaluega, Komisi o le Afaigaluega o Galuega a le Malo po o se Ulu o se Matagaluega a o faagasolo le vaitaimi o lona tofiga i le Komisi.

(3) I le noatia ma le fai fuafua i lenei fuaiupu ma i le tulaga e faapea o se tagata faigaluega a le Malo ua tofia e avea o se Komesina po o se tagata ofisa po o se tagata faigaluega a le Komisi, o lona tofiga o le a le aafia ai ana aia tatau ma tulaga aloaia e avea o se tagata faigaluega a le Malo ma mo faamoemoga uma e tusa ai ma lana tautua e avea ai o se Komesina, tagata ofisa po o se tagata faigaluega o le a avea o lana tautua e avea ai ia o se tagata faigaluega a le Malo.

(4) A o faagasolo le vaitaimi o le tofi e avea ai o se Komesina, tagata ofisa po o se tagata faigaluega a le Komisi, o se tagata faigaluega a le Malo e agavaa i le na o le mauaina e ia o le totogi, alauni, tupe totogi ma faamanuiaga e pei ona aiaia i lalo o lenei Tulafono ma e le tatau ona agavaa e mauaina so o se totogi, alauni po o isi tupe totogi e tusa ai ma lona tulaga o se tagata faigaluega a le Malo.

(5) E leai se mea i totonu o lenei fuaiupu o le a avea ma mea e faatapulaaina ai po o e tuuese ai se tagata faigaluega a le Malo mai i so o se aia e mafai ona agavaa i ai o ia e tusa ai ma se penisione po o se supaanueta.

(6) E leai se mea i totonu o lenei fuaiupu o le a avea ma mea e faatapulaaina ai le Komisi o Galuega a le Malo po o se Ulu Tumau i le faatinoga o a latou matafaioi masani tau pulega ma matafaioi tau pulega o tupe i le toe foi atu i galuega a le Malo o se tagata faigaluega a le Malo i le maea o se vaitaimi sa faigaluega ai i le Komisi.

20. Supaaneueta po o alauni litaea-(1) O le a totogiina ni vaegatupe e ala atu i ni saofaga po o ni fesoasoani mai lea taimi i lea taimi i totonu o so o se Faaputugatupe po o se Polokalame ua faamaonia e le Fono Faatonu mo le faamoemoe i le mauaina o supaaneueta po o alauni mo faamalologa litaea mo le Komesina ma so o se tagata ofisa ma so o se tagata faigaluega ua tofia i lalo o lenei Tulafono.

(2) Afai ua faamaonia e le Fono Faatonu se Faaputugatupe po o se Polokalame i lalo o lenei fuaiupu o le tulafono e pulea ai sea Faaputugatupe o le a teuteuina e tusa ai ma lea tulaga e aiaia ai mo le Komisi e avea ai o se tagata e faafaigaluegaina tagata faigaluega, ae o le Komesina ma so o se tagata ofisa ma so o se tagata faigaluega o le a avea o se tagata faigaluega.

21. Puipuiga mai moliaga tau i le va o tagata-(1) O se moliaga po o nisi taualumaga faa-faamasinoga mo mea e faaleagaina o le a le pau i luga o le Komisi e tusa ai ma so o se mea ua fai, po o le le faia, i luga o se agaga lelei:

(a) I le faatinoina, po o le faamoemoe e faatinoina, o so o se matafaioi a le Komisi; po o

(b) I le faatinoina, po o le faamoemoe e faatinoina, o so o sana pule.

(2) O se moliaga po o isi taualumaga mo ni mea ua faaleagaina e le pau i luga o le Komesina po o so o se tagata ofisa po o se tagata faigaluega o le Komisi e tusa ai i so o se mea ua faia, po o le le faia, i luga o le agaga lelei e le Komesina, tagata ofisa po o se tagata faigaluega, po o le a lava le tulaga e i ai, i le faatinoina, po o le faamoemoe e faatinoina, o ona tiute i lalo o lenei Tulafono.

22. Tupe e ao ona faatatauina e le Fono Aoao Faitulafono mo faamoemoega o lenei Tulafono – O totogifuapauina uma, totogi, alauni, ma isi tupe alu e totogiina atu pe faatupulaia i lalo po o i le faafoeina o lenei Tulafono e tataua ona totogiina mai tupe ua faatatauina e le Fono Aoao Faitulafono mo ia faamoemoega.

23. Vaegatupe a le Komisi-(1) O vaegatupe a le Komisi o le a aofia ai:

- (a) So o se tupe ua faatatauina e le Fono Aoao Faitulafono mo faamoemoega a le Komisi ma totogiina i le Komisi mo faamoemoega o le Komisi;
 - (b) Isi tupe uma ua mauaina e le Komisi e tusa ai ma le tulafono mo faamoemoega a le Komisi;
 - (c) Tupe Maua uma faaputupu e maua mai i so o se auala tau tupe maua.
- (2) O vaegatupe a le Komisi o le a faafoeina e tusa ai ma aiaiga o le Tulafono o Pulega o Tupe a le Malo 2001.
- (3) Mo faamoemoega o le Tulafono o Pulega o Tupe a le Malo 2001, o le a avea ai le Komisi o se Matagaluega a le Malo.

24. Pule faaletulafono a le Komesina o Sulufaiga (Ombudsman) i luga o le Komisi -

Vaega II: O isi faalapopotoga o lo o i le Faamatalaga i le Tulafono o le Komesina o Sulufaiga (Ombudsman) 1988 ua teuteuina i le faaopoopoina i ai o upu “o le Komisi o le Toefuataiga o Tulafono” i lalo o upu “o le Komiti Faatino o Eleele”.

25. Pule e faia ai tulafono faatonutonu – E mafai e le Ao o le Malo, e faia i luga o le fautuaga a le Kapeneta ona faia ni tulafono faatonutonu mai lea taimi i lea taimi e faamaotiina ai mataupu e faapea:

- (a) O lo o manaomia pe faatagaina e lenei Tulafono e ao ona faatonuina; po o
 - (b) E talafeagai pe e ao ona faatonuina mo le tauaveina po o le faamallosia o lenei Tulafono.
-